

বায়ুযানে পঞ্চাশ মাইল (সফল স্বপ্ন)

রোকেয়া সাখাওয়াত হোসেন

যে সময় আমি “সুলতানার স্বপ্ন” লিখিয়াছিলাম, তখন এরোপ্লেন বা জেপেলিনের অস্তিত্ব ছিল না; এমনকি সে-সময় ভারতবর্ষে মোটরকারও আইসে নাই। বৈদ্যুতিক আলোক এবং পাখাও কল্পনার অতীত ছিল। অন্ততঃ আমি তখন সে সব কিছুই দেখি নাই।

প্রায় ছয় বৎসর পরে (১৯১১ খ্রীঃ) কলিকাতায় আসিয়া প্রথম হাওয়াই জাহাজ অতি দূর হইতে শূন্যে উড়িতে দেখিলাম। আমি নিজে কখনও উড়ো জাহাজে উঠিতে পাইব, এরূপ আশা কখনই করি নাই। শুধু নীরবে দীর্ঘনিঃশ্বাস ফেলিতাম।

গত ৩১শে নভেম্বর (১৯৩০ খ্রীঃ) রবিবার সন্ধ্যার পর যখন শ্রীমান মোরাদ আসিয়া বলিলেন, “খালা আন্মা, চলুন, আগামী পরশু আমার প্লেনে আপনাকে উড়াইয়া আনি; কলিকাতার চারিদিকে উড়িতে প্রায় ৩৫ মিনিট লাগিবে!” তখন আমার প্রাণ অভূতপূর্ণ আনন্দে নাচিয়া উঠিল।

এ-শুভ সংবাদ বেশি লোককে জানাইলাম না দুই কারণে:—প্রথম কারণ এই যে, মাত্র দুই মাস পূর্বে, “আর ১০১” নামক সুবৃহৎ এরোপ্লেন ধ্বংস হওয়ায় ৪৫ জন হতভাগ্য আরোহী সশরীরে নরকানলে দগ্ধ হইয়াছে। তাহার বিভীষণ স্মৃতি লোকের মনে তখনও জাজ্জল্যমান থাকায় সকলের মনে এরোপ্লেন সম্বন্ধে ভয়ানক আতঙ্ক আছে বলিয়া আমাকে লোকে উড়িতে বাধা দিবে। দ্বিতীয় কারণ, অনেকে ক্যামেরা লইয়া উপস্থিত থাকিবে আমার ফাটো লইতে।

যথাকালে ২রা ডিসেম্বর মঙ্গলবার বেলা প্রায় ৪টার সময় আমরা শুভযাত্রা করিলাম। এক মোটরে মিসেস্ রাসাদ (শ্রীমান মোরাদের মাতা), তাঁহার তৃতীয় পুত্র ফোয়াদ, মিসেস্ দে এবং আমি; অপর মোটরে আমার ভগিনী ও তাঁহার পুত্র কন্যা প্রমুখ ছিলেন। যাত্রার সময়ে দেখি, আমার এক স্নেহময়ী ভগিনী মিসেস্ দাউদর রহমান আসিয়া উপস্থিত। তিনিও আমাদের সঙ্গে দমদম চলিলেন।

এরোড্রামে গিয়া দেখি, একেবারে মুক্ত ময়দান! কেবল আমাদের মোটর তিনটি এবং আমরাই! আমি আল্লাহকে ধন্যবাদ দিয়া বঙ্গের গৌরব প্রথম মুসলিম পাইলট শ্রীমান ‘মোরাদের’ প্লেনে গিয়া বসিলাম। আকাশে উড়িয়া দেখি—ধরাখানা সত্যই সরা তুল্য। আমি ক্রমে ৩০০০ (তিন হাজার) ফিট উর্ধ্বে উঠিয়াছি। তখনকার দৃশ্য বড় চমৎকার। আমার দক্ষিণ দিকে অন্তগামী সূর্য্য, বাম দিকে ১১ই রজবের (দ্বাদশীর) পূর্ণ-প্রায় চন্দ্র,—উভয়ে যেন আমার দিকে চাহিয়া মৃদু হাসিতেছিল। নীচে চাহিয়া দেখি—কলিকাতার পাকা বাড়ীগুলি, কোঠা-বালাখানা, এমারত সব ইষ্টক-স্তম্ভের মত দেখাইতেছে,—হাবড়ার পুল কতটুকু খেলনা বিশেষ, আর হুগলী নদী,—সে ত জলাশয়ের সামান্য একটি রেখার মত দেখাইতেছিল। আমরা পঞ্চাশ মাইল চক্কর দিয়া নীচে

আসিলাম। আমি নামিলে পর মিসেস্ রাসাদ মাত্র ৫ মিনিটের জন্য উড়িলেন। শোকর আল্-হামদোলিল্লাহ্।

২৫ বৎসর পূর্বে লিখিত “সুলতানার স্বপ্নে” বর্ণিত বায়ুযানে আমি সত্যই বেড়াইলাম। বঙ্গের প্রথম মুসলিম পাইলটের সহিত যে প্রথম অবরোধ-বন্দিনী নারী উড়িল সে আমিই। আমার পূর্বে যে কয়জন বঙ্গীয় মুসলিম মহিলা এরোপ্লেনে উঠিয়াছেন, তাঁহারা উড়িয়াছেন সুদক্ষ ইউরোপীয়ান পাইলটের সহিত। আর তাঁহাদের মাথায় হেলমেট, কানে টেলিফোন এবং চক্ষে গগল্‌স্ ছিল। আমার এ সব কিছুই ছিল না। আমি সম্পূর্ণ নিরস্ত্র ও নিরুপায় অবস্থায় একটি বালকের সহিত গিয়াছিলাম। মধ্যপথে প্রয়োজন বোধ করিলে মোরাদের সহিত কথা বলিবার আমার কোনই উপায় ছিল না। শীতে কষ্ট হইবে না শুনিয়া গায়ের শালখানাও “মিসেস্”দের হাতে ফিরাইয়া দিলাম। প্লেনে বসিলে মোরাদ বলিলেন, “খালা আম্মা! ভাল মতো কান ঢাকিবেন।” যাঃ! কান আর কি দিয়া ঢাকিব?—শালটাও ত ফেলিয়া আসিলাম। সে সময় মাথার আঁচলখানাই ছিল একমাত্র সম্বল। ইঞ্জিনের ভয়ঙ্কর গর্জনে যখন কানে তালা লাগিতেছিল, তখন বুঝিলাম, মোরাদ কেন কান ঢাকিতে বলিয়াছিলেন। কিন্তু আমার আভ্যন্তরীণ আনন্দের আতিশয্যের তুলনায় সে কষ্ট অসহ্য হইলেও, নগণ্য বোধ হইল।

বিমান-বীর মোরাদের সৎসাহস অত্যন্ত প্রশংসনীয়। আল্লাহ্ তাঁহার মনোবাঞ্ছা পূর্ণ করিয়া তাঁহাকে নিরাপদে ফিরাইয়া আনুন, ইহাই আমাদের আন্তরিক প্রার্থনা।

কিন্তু আমি বলি, মিসেস্ রাসাদের ধৈর্য্য এবং সাহসও কম নয়। বেচারী অসহায়া বিধবা যে কত বড় পাষাণে বুক বাঁধিয়া প্রথম সন্তানটিকে সম্পূর্ণ একাকী কেপটাউন অভিযুখে রওনা হইতে দিয়াছিলেন এবং এখনও মোরাদকে একাকী বিলাতে যাইয়া প্লেনে কাজ শিখিতে দিয়াছেন তাহা ভবিষ্যৎ বিষয়। আল্লাহ্ তাহার সহায় হউন! আমিন!

লেখক-পরিচিতি

রোকেয়া সাখাওয়াত হোসেন ৯ই ডিসেম্বর, ১৮৮০ সালে রংপুর জেলার মিঠাপুকুর উপজেলার অন্তর্গত পায়রাবন্দ গ্রামে জন্মগ্রহণ করেন। তাঁর পিতা জহীরুদ্দিন মোহাম্মদ আবু আলী হায়দার সাবের আর মাতা রাহাতুল্লেসা সাবেরা চৌধুরানী। তিনি ঊনবিংশ শতাব্দীর একজন খ্যাতিমান বাঙালি নারী-সাহিত্যিক ও মুসলিম সমাজসংস্কারক। তাঁকে ‘বাঙালি মুসলিম নারী জাগরণের অগ্রদূত’ হিসেবে গণ্য করা হয়। তাঁর প্রকৃত নাম ‘রোকেয়া খাতুন’ এবং বৈবাহিকসূত্রে নাম ‘রোকেয়া সাখাওয়াত হোসেন’। রোকেয়া ঘরে বসেই প্রাথমিক শিক্ষা আরম্ভ করেন এবং তাঁর আধুনিকমনস্ক বড় ভাই ইব্রাহীম সাবের ঘরেই গোপনে বোনকে বাংলা ও ইংরেজি শেখান।

১৯৮৯ সালে ১৮ বছর বয়সে রোকেয়ার বিয়ে হয় বিহারের ভাগলপুরের ডেপুটি ম্যাজিস্ট্রেট সৈয়দ সাখাওয়াত হোসেনের সাথে। বিয়ের পর তিনি ‘রোকেয়া সাখাওয়াত হোসেন’ নামে পরিচিতি হন। স্বামীর আত্মহে রোকেয়া সাহিত্যচর্চা শুরু করেন এবং ১৯০২ সালে ‘পিপাসা’ নামে একটি বাংলা গল্প লিখে সাহিত্যজগতে পদার্পণ করেন। কিন্তু ১৯০৯ সালে সাখাওয়াত হোসেন মারা যান। তখন রোকেয়া ভাগলপুরে ‘সাখাওয়াত মেমোরিয়াল গার্লস স্কুল’ নামে

একটি মেয়েদের স্কুল এবং ১৯১৬ সালে মুসলিম বাঙালি নারীদের সংগঠন 'আজুমানে খাওয়াতিনে ইসলাম' প্রতিষ্ঠা করেন। রোকেয়া সাহিত্যরচনার মাধ্যমেও সমাজসংস্কারের চেষ্টা করেছেন। তাঁর রচিত গ্রন্থগুলি হলো: 'পদ্মরাগ', 'অবরোধবাসিনী', 'মতিচূর'। তাছাড়া 'নরনূর', 'সওগাত', 'মোহাম্মদী' ইত্যাদি পত্রিকায় তাঁর লেখা প্রকাশিত হয়। 'Sultana's Dream' নামে একটি ইংরেজি রচনাও আছে তাঁর। ১৯৩২ সালের ৯ ডিসেম্বর রোকেয়া সাখাওয়াত হোসেন মৃত্যুবরণ করেন।

মূল বক্তব্য

রোকেয়া সাখাওয়াত হোসেনের 'বায়ুযানে পঞ্চাশ মাইল' রচনাটি প্রথম প্রকাশ পেয়েছিল 'মোয়াজ্জিন' পত্রিকার ১৩৩৯ বঙ্গাব্দের অগ্রহায়ণ মাসের সংখ্যায়। রোকেয়া এই লেখার একটি উপশিরোনাম দিয়েছিলেন: 'সফল স্বপ্ন'। তিনি ইংরেজি রচনা 'Sultana's Dream' বা তার ওপর ভিত্তি করে লেখা 'সুলতানার স্বপ্ন'-এ মেয়েদের নিয়ে স্বপ্ন দেখেছিলেন যে, মেয়েরা একদিন বৈজ্ঞানিক হবে, পাইলট হবে-অর্থাৎ সমাজ মেয়েদের যে কাজ করতে দেয় না, কিন্তু পুরুষেরা করে, সেই ভালো কাজগুলো করবে। সেই সমাজে মুসলিম মেয়েদের উড়োজাহাজ বা বায়ুযানে চড়াও তেমনি প্রায় নিষিদ্ধ ব্যাপার ছিল। কিন্তু রোকেয়া সেই কর্মটি সম্পাদন করেছেন অর্থাৎ তিনি বায়ুযানে চড়েছেন। এটাকেই তিনি স্বপ্ন দেখার সফলতা হিসেবে উল্লেখ করেছেন। তিনি মুসলিম পাইলটের সঙ্গে মুসলিম নারী হিসেবে আকাশে বিমানভ্রমণ করে পরিতৃপ্ত হয়েছেন। মানুষ তার ইচ্ছের মতো বড়-রোকেয়ার এই রচনায় এটাই মূল-বক্তব্য।